





歲雪詞

侯官

郭則澐

探芳信

同黑園丈策六游李氏園緋杏連林

裊裊花下倚此賞之

曉寒重乍半欹紅蕤鶯簾鎖夢認翠鶯行處


鳳尋香蜂蝶迷前路深淺春無縫付閒身管

賦初揮幽賞待誰共祇花壓吟巾雲隨游

林啼鳥和清弄九光杯淺春醒薄

龍顧山房詩集 夏孫桐署

新學  
馬  
氏  
集



Digitized by the Internet Archive  
in 2010 with funding from  
York University Libraries



龍顧山房詩餘卷之四

蘋雪詞

侯官郭則澐 蟄雲

採芳信

同嘿園丈策六游李氏園緋杏連林春韶正麗  
裊裊花下倚此賞之

曉寒重乍半斂紅蕤鶯簾鎖夢認翠嚮行處鈿妝鬪珠  
鳳尋香蜂蝶迷前路深淺春無縫付閒身管領東風錦  
城初擁 幽賞待誰共祇花壓吟巾雲隨游鞚寂寞園  
林啼鳥和清弄九光杯淺春醒薄  
杯醜九光杏放翁句 羯鼓休催  
送數年華誤了蓬山小宋

惜餘春慢

錢春

幾日朱樓東風如夢數到銷魂時候香塵舊苑粉本殘  
山誰省倚闌人瘦猶是春前畫廊覓徧斜陽翠幃紅倦  
問王孫歸路津亭遂罷暮寒知否還念我彈墨鸞襟  
沾香鴛帟漸漸風情非舊傷高有淚怨別何心坐數落  
花偏久聽到千山杜鵑芳夢醒初清鐘催後縱空簾重  
捲綠陰如許怎禁回首

青玉案

和臣盒聞歌

飛紅不是江南路又斷影鶯留住酒淚天涯無灑處夜  
香亭館小箏如語目送春來去錦箋漫疊銷魂句瘦



損腰圍儘憐汝寄與玲瓏傳別緒曲殘苔榭夢迷花墅  
鐙外瀟瀟雨  
空齋和立盦次小山韻  
薄酒醒初清歌散盡天涯捎到傷春信綠窗深閉雨聲  
中更何人把流鶯問  
簾冷香殘樓高花近檀心拗斷  
難成寸愁隨逝水有時迴夢尋飛絮無踪認

弄水分涼偎花戀暝柳棉舞罷風初定鳳簫人去太怱  
怱晝長無奈重簾靜  
倦思芳茵殘妝粉鏡尋春那似  
年時興夜來夢到謝堂無可憐孤燕窺人醒

繡幙飄煙朱闌貼水花陰一片悵悵地粉牆西角有誰

來蘚香猶印鞦韆痕翠  
歛袖添顰停杯如醉心頭多少  
閒情事當時軟語約春鴻雲羅誤了相思字

訴恨箏低籠愁釧重新寒祇與酴醾共斷無蜂蝶入簾  
來珊鈎卻為微風動舊誓瞞鸚鵡新歌怨鳳思量拚付  
春窗夢樓前花影散如潮多情還借斜陽送

綠意

詠綠陰

空幃怨結早緒風翦斷千點花雪畫閣悵悵憑問瑤雲  
憶否款春時節閑行待覓眠琴處誤舊香晚鶯猶說漸  
鬢絲減了樊川似向雲西傷別還愛堆屏碧淨小庭  
乍過雨清沁苔髮夢後風光落盡天紅宿鳳應憐香葉



攀枝漫怨青青子，襯細草一般幽絕。又夜涼分到吟襟，  
罨畫半簾煙月。

還京樂

寒碧移社集喜蒼虬同年來自海上

飲君酒且喜尊前此日流人在，歎客中霜鬢廿年忍淚。  
頻看滄海恁醉吟，無賴傷心更寄斜陽外。聽杜宇啼苦，  
畫裏殘山愁改。儘龍鍾態待褰衣還倚，高樓繞夢星  
辰猶是上界。蒼涼語咽荒雞起，中宵似聞孤噫。感蹉跎  
空燭，颭秋魂簫沈夜籟。負了湖山約，何時單舸同載。

賀新涼

南塘泛舟觀荷

放棹虹橋晚乍銷凝斜陽幾縷亂蟬吟斷劃破玻璃雙  
槳瘦葉葉風香暗染漸閃出凌波妝面搖蕩煙魂扶不  
起甚閑情付與參差燕歌管歇水雲遠 多生負了看  
花眼恁怱怱銀塘照影總關清怨無限秋心隨遂去遂  
外風蒲似翦又盪起漁燈星點也擬拏芳前浦路妒雙  
鴛結就煙波伴還小泊綠楊岸

鷓鴣天

露臺夜坐和息厂韻

風袂飄飄一倚欄笙歌聲在碧霄間星搖遠火收殘雨  
雲展涼陰作晚山 頻問夜乍驚寒思量鬧處遣餘閑  
樓臺便是滄桑影獨愛明河隔坐看



惜紅衣

用石帚韻賦瓶中殘荷

彈粉偎煙蕊脂映日倦妝無力半解明璫依依鏡波碧  
涼叢戀晚偏暗付飄蓬詞客愁寂清簟夢回閱篝香千  
息金鰲舊陌攜酒前踪浮花淚痕藉憑闌萬感水國  
渺天北幾許錦鴛飛斷誰辨暗愁來歷牘翠盤殘舞憐  
取昔時顏色

前調

臣盒復將出關枉過話別疊韻賦贈

倦眼看天狂歌送日病餘心力坐盡斜陽窗筠戀寒碧  
征蓬漫恨還一笑深杯留客羈寂鷗夢漸醒約荒波棲

息 高樓廣陌惆悵空歸歌茵亂愁藉新亭淚斷去國  
任南北為憶故陵佳氣天外也曾攀厯折晚香誰寄憑  
問白山秋色

玲瓏四犯

夏夜聽雨

小簾分涼淅淅瀝窗蕉幽恨初緊做盡淒涼偏是漏殘  
香燼簾外冷翠沈沈早過了隔江梅信料渚荷一夜紅  
褪花底錦鴛愁損 少年聽慣何曾省憶朱樓玉簫徐  
引銷魂唱到瀟瀟曲尋夢吳雲近鐙背細點舊愁悄怨  
著曉鐘無定怕鏡屏秋早偷減了雙青鬢

鳳棲梧



題梧葉寄臣奩

葉葉梧窗秋歷亂  
葉底秋心皺盡何曾展  
錦瑟年光愁裏換  
西樓月好無來雁  
一縷檀雲飄夢斷  
夢向天涯碧草和天遠  
聞道洞庭波又淺  
空江誰管芙蓉怨

買陂塘

南塘秋泛用樊榭韻

問靈槎者番消息  
濛濛銀浦雲暗愁煙怨  
雨年年意併入夕陽淒黯  
渾易感奈誤了星期慣  
把離腸賺  
蕢風夢澹賸萬斛清愁涼  
波捲去寂寞水窗掩  
輕橈影曾傍西亭菡萏  
詩心猶戀冰簟魚天一角清  
如許應是晚霜來漸  
帆葉斂看白鳥明邊不著閑鴉點  
溼雲未減便盼

斷前汀料無雁過楓淚幾行染

疎影

詠影

驚鴻一瞥似鏡波半掩偷眼癡絕肯便輕拋微步依依  
密意慣憐鶼鶼殷勤照向春波裏奈幾許閑情難說便  
隔花遠似天涯小立慰人孤孑猶憶雲屏促坐髻翹  
翠鳳顫娥態都活洛浦神光乍合還離怨煞碧窗明月  
朦朧替寫愁心眼問怎寫黛眉千結又繡帷一笑迴鐙  
暗裏也應傷別

渡江雲

詠桂



青琴彈月罷霧香漠漠風引到銀屏麝塵留不住細結  
秋心一半付漂苓妝鈿翦碎傍畫欄啼露珠輕剛夜涼  
碧窗如水夢共小蟾醒 伶俖前身空託上界曾攀訝  
飄雲無定憑檢點淮南幽怨人老巖扃何因重見仙旗  
翠又瑤園催換新聲金粉影相憐愁鬢星星

前調

忺盒歸自海上話舊酒樓惘然有賦

紅樓微雨夜短篷乍卸仔細話江南錦絃秋共瘦冷約  
花前對酒怎成酣吳雲夢杳記當時春在珠簾吟望頻  
賺人迴顧津柳漸氈氈 愁沾鴛塵舊帔蠹粉殘牋歎  
狂才都減休更說江花江草恨滿歸帆荒波對席閑鷗

老賸風情分付何戡淪落慣無端也溼青衫

水龍吟

中秋夜同息厂登臺翫月

一臺穩占高秋秋情祇許詞人領華鐙盡處碧雲都歛  
玉蟾孤映去雁關河啼烏城闕蒼茫天迥睇瓊樓前路  
笙歌飄斷空吟徧涼星影偏是孤醒易醒背西風繁  
霜愁迸瑤宮此夜霓裳殘舞為誰端整笑浣飛塵危闌  
下瞰琉璃千頃問何時快意素鸞騎去醉蓬萊頂

憶王孫

詠秋草

荒翠無情霜漸緊愁數盡雁朝蛩暝舊時金埒不重來



又瘦了斜陽影  
離離千里關山迥  
偏只似別來心徑  
冷煙和夢兩朦朧  
要盼到東風醒

畫堂春

詠燭

搖紅畫閣影依依  
殘宵曾伴釵圍  
靨星眉月兩參差  
宿燕幾曾知  
寒粟漸沈金燼暗  
花還隱羅帷  
春心灰透已多時  
有淚祇偷垂

月華清

詠寒鐘

幽徑沈雲危峰攔暝  
寺樓知在何許  
響落空江  
怕有魚龍潛舞  
洗衆籟  
山月高時  
警斷夢水風清處  
凝佇又諸

天定後一聲殘杵 悟到浮生去住數雪北香南幾番  
朝暮喚破塵心報與沈沈朱戶恨無奈匝地笙歌愁易  
斷隔城笳鼓誰語問銅山消息繁霜應阻

滿江紅

杭州南高峰麓法相寺前古樟 純廟南巡累  
經題賞辛亥 遜位詔下樟忽一夕而枯過客  
驚歎目為忠樟社侶約同墳是調賦之

鬱鬱蒼蒼縱灰燼猶存正色記一夕風雷飛去頓驚移  
國材大恥干梁棟用心摧怒挾神明力算英靈終古共  
湖山精忠柏 安否訊殘僧識生死劫遺民泣恁萬牛  
難挽故根如石定有蟲書成病已終煩羽葆扶玄德歎



空枝留照總淒涼  
虞淵日

鬲溪梅令

玉釵影顫酒波寒  
醉花間昨夜東風不到曲闌干  
舊愁千疊山較量帶眼隔年寬  
問雲鬟乍近春前春恨便相關  
日長絃索閑

一萼紅

人日花下觴集用石帚韻

小樓陰認莓鬟數點邀夢理紅簪  
凍解冰鱗光浮蠟鳳  
芳夜清酌沈沈翠尊冷  
疏香乍染又幽唱催起宿花禽  
錦柱憐聲彩旛羞髻暗怯春臨  
回首承華天遠問東風何世  
皺損芳心油卜疑乖  
麝香總負殘緒重費溫尋

早飛盡梅梁舊燕。賸泥痕還印畫屏金。漫道愁來是醉。

醉淺愁深。

愁來渾是醉  
徐賁人日句

瑞鶴仙

得映奩海上書卻寄

渺蓬山路斷南雁到。說道滄波又淺。收鐙舊庭院。問瑤  
笙吹澈春寒誰管。芳尊幾換。賸暗塵花外自輒料。瓊仙  
去後。飄盡夢痕。夜夜銅輦。莫笑瑤梁意倦。一樣峯嶺  
儘輸檣燕。空簾怨晚。愁蛾影怕人見。向高樓試望煙蕪  
如許。斜陽何處更戀縱江春好在。應是淚鵲灑徧。

一枝春

題彭剛直公紅梅畫幀  
是幀以飾外姑俞夫



人青廬者夫人固剛直女孫也舊有公手書楹  
帖為媵中經散失余於沽上閱市得之外舅因  
併舉是幀見賚謂既慶珠還宜令劍合亦佳話  
也倚聲紀之

小幅橫斜寫冰姿為想吟香人健湘舲夢渺記否紅閨

傳硯玉義試展愛金幄碧簷相伴

公所書楹帖云金幄  
瑤筐開寶勝碧簷羅

帶入  
新詩

看老筆還鬪寒虬鐵石廣平如見

低徊聖湖殘

本憶山租舊抵苔枝題徧

公借居俞樓嘗繪梅  
花大幅以為賃直

璚奩幻

影換了認春池館

曲園有  
認春軒

微雲漫許早才盡夢中花管

慙閉閣清對癯仙自忘歲晚

宴清都

春曉窺窗緋桃初嫵倚此寫之

一鏡妝鬟重簾外紺雲低護清曉籠綃掩媚欹鈿鬪  
舞絳仙嬌小樓臺澹粉裝成報昨夜東風又到待下階  
屣步都慵斷腸暗付啼鳥思量錦瑟流光頻年花底  
夢共春杳紅簪惱鬢香巾惹淚倚欄人老無言似怯漂  
苓忍重理韋郎怨調怕後期更把芳尊斜陽瘦了

水龍吟

冰絲蠶感舊

故人來酌殘觴草堂猶是題詩處棲塵短榻繡苔荒徑  
風流誰主冷眼論兵狂才賭曲廿年心素正江山搖落  
寥空鶴下應悽斷新亭語也識浮生無住感前踪滄



波漂羽夢門訪杜湘皋哀屈伶俜詞賦一瞑攀天千憂  
入地蕭然終古又歌殘楚些低徊笛淚背斜陽去

齊天樂

述懷次和蒼虬兼呈彊村詞丈

飄蓬一往無南北伶仃更教輕別迸淚毫枯沾霜鬢短  
寸寸心塵難滅荒波萬疊念夢裏神州斗垂天闊索共  
書空此懷休向海鷗說危枰殘劫換盡望長安何許  
離黍宮闕亂後笙歌愁邊鼓角偏又啼烏悽絕浮生懶  
閱縱願斷香留總成灰劫未了芳情渚蘭空怨結

石湖仙

題映奩所藏大鶴山人詞札

楓香飄斷祇彈雨吳牋鉛淚猶泣花冷石芝崦怕年來  
雕欄又換浮名身後問可抵一生幽怨悽戀費故人翦  
紙千喚江南俊游宛在聽新詞羅裙唱徧瘦碧沈吟  
等是傷春心眼曩名吾籀曰瘦碧浪公謂與山人複易以寒碧瀉恨杯螺擔愁  
釵燕夢雲都幻華表遠翛然語鶴天半

蹋莎行

詩趣亭桃花下茗坐蒼虬有詞因次其韻

窺徑紅深抱亭翠冷花陰轉過斜陽近不辭破笑為東  
風祇應愁靨難端整  
斂鏡羞霞飄衣褪粉流鶯啼罷  
春魂醒夢痕不暖舊闌干連昌宮畔傷心影

聲聲慢



題清微道人空山聽雨圖

貝經繙罷檀篆薰殘山屏鎮日瀟瀟散徧天花人間猶  
話靈簫門前漲添鴛水問新來誰繫蘭橈瑤臺畔乍春  
雲悄倚寫盡無聊還憶蓮帷人病漸佛妝慵整閑了  
珠翹夢怯清鐘分明身似芭蕉相憐畫窗瘦影倩留題  
衫角裙腰空費淚又楓江悽斷暮潮

道人別有楓江秋冷小影

臺城路

寄懷君坦青島即借其登柳樹臺望勞山韻

卧樓人共黃花冷沈沈斷鴻來暮病減秋尊衰添曉鏡  
算是清愁如故夢迷鷺浦認暝色重山亂雲無數說到  
銷魂竹聲剛送畫簾雨人間同是倦客楚蘭漂恨慣

芳約難據散雪吟殘迷陽唱倦顛倒春蠶千緒新霜更  
苦儘翦碎薦香玉璫慵訴遂外蒼涼海雲孤倚處

浣溪沙

雪後登臺寫望

雪外樓臺玉幾重六街鐙火澹連空斜陽到海不成紅  
過鳥影迷深淺霧歸帆夢引去來風倚欄人在鏡奩  
中



龍顧山房詩餘卷之五

冰蠶詞

侯官

郭則澐

蟄雲

清波引

臣奩寄示長春西園新詞同韻抒感

卧虹春冷宛圖就石湖詞境亂雲無定晚笳喚愁醒怨  
歌訴流水料有游鱗廝聽最憐前度雕欄早銷卻絮花  
影  
羈游暫領渺身世猶是汎梗錦牋攤暝認清淚鉛  
凝重來鬢絲改肯負寒蘭心性祇恐窺檻狂鶯笑人孤  
凭

琵琶仙

蜨仙謠社集以疾未赴感拈是解

重對滄鷗驀迴眼，換卻年時春色。幽幃曾約絲楊依依，  
待歸客多少？意釭花細翦，怕吟望、照來頭白。急軫心凋，  
危絃淚咽，還戀今夕。又看到宮蠟煙殘，歎春後風光，  
幾虛擲。料理蘭蠶孤緒，付微吟、呵壁偏夢裏。清歌易散，  
更暮雲睇斷，天北準備離笛。千愁瘦魂禁得。

龍山會

仲雲汎舟秦淮有詞和夢窗韻見示，余亦繼聲。  
碧樹秋無罅，夢到青溪幾曲。賞波亞珠簾，漂影斷歌管，  
地三兩野鷗飛下，依舊六朝山。寫淒怨、煙眉澹泊，感芳  
游、敲篷晚雨，淚花紅灑。天末暫聚征蓬，影事坊南憶，  
少年裘馬過江人。漸老瑤瑟冷，彈向青林幽夜，何處不



滄波渺孤恨深杯暗瀉醉休捨只莫似山公巾倒挂  
菩薩蠻

和蘭石詞韻

低鬟愁壓雙金雀啼珠瑣碎紅冰薄花影轉殘更參差  
夢後情悲歡瞞鏡影除是箏奴省停柱惹相思天寒  
來雁遲

珠簾十里塵如海尋春舊徑青蕪改衰柳故垂垂愁牽  
未盡絲空尊禁汎淚細記尊前事處處是斜陽樓高  
教斷腸

齊天樂

雨夜讌集即事

人生難得秋前雨安排畫屏今夜韻逗歌蟬涼分宿燕  
新曲巫娥彈罷狂枝翠亞漸暗水漂花酒懷俱瀉一洗  
鴛塵屨痕愁問舊亭榭 伶俜憐取小鳳乍飄鐙去晚  
羅袖禁灑錦陌心遙銀灣路迥多恐蓮房香卸歡華暫  
捨賸斷續千絲楚雲縈惹起聽簷鈴冷釭紅又爍

水龍吟

息尸觀龐郎季雲演明妃故事約同賦

佩環試與招魂蠻韉窄袖人如玉昭陽日影荆門山翠  
夢懸雁足報取君恩燕支一騎降城重築歎白沙青冢  
春風不到空千載傷心曲 重現紅糴華燭莽關山愁  
長絃促嬋娟萬里丹青餘怨歌雲斷續漢月心孤胡天



淚冷秋蛾猶蹙更周郎俠氣當筵一顧勝黃金贖

鷓鴣天

和立齋

柳外樓臺小苑幽驚鴻影斷記前游  
苔綦綠掩吟春榭菱唱涼生汎月舟  
新夢覺舊香留三生風絮管離愁  
瑤池酒罷清歌歇青鳥飛回也白頭

蹋莎行

香暝金篝影迴羅扇薜蘿綠偏閑  
庭院高樓昨夜自東風梨花雪盡何人管  
小夢難圓濃香易斷新來祇覺  
當杯懶捲簾無奈是斜陽畫梁誤了歸來燕

瑞鶴仙

仲雲寄示傭廬春集詞索和

款簾風絮亂問歸鴻消息隔江春遠狂花繞吳苑又湔  
裙新楔杯香簫暝青山笑盼倩邀笛蘭成宅畔羨游蓬  
重夢東華密炬暗紅初翦腸斷當筵悽語掃盡巢痕  
客愁如燕裊裊舞扇忍拋卻舊釵鈿指朱樓高處風光  
空在總付煙霏霧卷縱石腸得似吳兒海桑怕見

前調

為霜根同年題四當軒勘書圖

盥芸香耐晚記人海冥冥翠波三淺春痕夢中換枉蘭  
臺紉史槐街行卷丹鉛老伴笑縑殘愁絲似繭乞餘年  
細檢秦灰猶是補天心眼休管栖仙蟬瘦橐夢螢枯



有涯俱幻藜光自暖算營就太平館儘千金殘帚寒窗  
消受掃葉朝來又滿莫披圖憶到江南數峰澹遠

漢宮春

蟄園牡丹盛開浩態酣春穠香薰晝命觴留賞  
如在石家錦障中也用夢窗韻寫之

宮扇開時訝錦窠雲髻新降仙姝含情暗歛粉靨濃夢  
剛蘇凋闌舊倚傍瑤天風露都殊春似怯霞帷半捲綠  
衣低捧瓊盃洛浦頻年怨別恰歸驄暫駐教伴清娛  
殷勤墜香漫掃歌席憑鋪金裊舞罷又幽禽催喚提壺  
還仔細羅屏雨重玉妃酒困誰扶

浣溪沙

為人題並蒂白蓮畫冊

夢入瑤天片月涼  
波並影舞霓裳  
雙成家在水雲鄉  
微步依依憐素韞  
同心的的繫明璫  
鴛鴦飛過也思量

前調

和釋堪感事即效其體

繫馬青門認故枝  
雪香吹盡燕歸遲  
年年客裏負芳期  
鏡語難憑情似幻  
琴心欲託意還癡  
春回可有夢回時

渡江雲

雨夜有懷和蒼虬韻



蕉聲疏未斷暗釭簸夢倦枕十年心卷簾秋冉冉迸淚  
衰荷恨染越羅深嘶驄路渺賸領取風葉清吟凝望頻  
隔江煙水一雁動寥音 追尋歆巾殘話翦燭閑悵奈  
雲萍無準枉幾度蟬停歌軫燕蘸啼襟縱教洗盡星河  
影說淒涼還怨辰參孤思永篝香小閣愔愔

燭影搖紅

寄懷臣奩濱江即和其中秋書感韻

笳鼓重關亂雲極望愁無際龍沙飛鞚廿年蹤天遠禁  
迴睇多事孤吟費淚倩邊鴻丁甯怨意楚蘭歧路是處  
殘山菟裘何計 憔悴憐儂共支病枕西風裏挂弔虛  
壁掩蛛塵垂老空奇氣安得懽觴破例話滄波鐙床更

倚夜來殘月撩夢荒江暗楓迢遞

安公子

賦燭淚

背枕釵蟲冷畫屏斷夢啼難醒灑徧銀荷迴眼處怨東  
風無定醉舞夜殷勤記與籠紗靚尋墜懽可奈千愁迸  
又漢宮傳罷遙想仙盤孤映滴盡鼉更永繡茵輕浣  
何人省網戶沈沈堆恨在怕沾來蕭髻儘惜別芳心怎  
便成灰肯憐暗紅結就相思影問幾時雙照認取靨星  
春凝

被花惱

題鐵夫同年桐陰勘書圖用紫霞翁韻



詩愁攔住畫樓陰  
商略雨昏煙曉暗  
惜孤根舊春少  
瑤雲欲墜青鸞罷  
舞冷夢蘊蘊覺欹  
髹几檢琅籤翠簾  
重寫西風照惆悵  
問華林多恐空階  
翳荒草幽牕戀影  
悄熨蟬香地迥塵  
難到待安排鳳軫  
譜清商又銷減腰  
圍為秋惱撫雪鬢  
好約桐君閑處老

東坡引

鶯簾呼夢起  
桃鬟泣妝淚  
一炊新火閑牕底  
愁來除是醉  
空尊忍覆危絃  
懶理漸換了中年意  
飛紅猶向東風地  
酒醒春去未酒醒  
春去未

鷓鴣天

折柳樓紫丁香  
一枝寄匣塞上

夢隔鶯花更幾重  
豔陽催展舊珍叢  
半垂紫雪和煙溼  
千結瓊香勝酒濃  
愁黯黯  
信息  
息折枝方便託邊鴻  
斷腸人比春前瘦  
何況高樓雨又風

三妹媚

次和蘭史留園感舊

吳春醒倦眼記輕撓  
來時柳絲初翦  
十二樓空黯舊愁  
說共謝堂殘燕暗碧  
無情偏占斷風亭煙苑  
一樣闌干  
怯倚斜陽背花人遠  
何事香塵輕散  
更片片殘山淚  
鵲啼晚瘦損酴醾對冷吟  
潘鬢也羞妝面綺夢無痕空  
剡蘚前題尋徧祇恐天涯醒後東風又倦

風入松



愛閑何事罷清尊  
花落未開門  
朦朧心眼迴  
帆後檢春衫  
半是愁痕舊  
渚夢尋芳草  
藂臺目斷孤雲  
伶俜樓燕語  
黃昏啼笑可曾分  
幾重羅幕餘寒  
帶問東風怎與  
溫存  
莫怨危闌煙柳  
人間處處銷魂

前調

暑夜

空簾花影轉金波  
深坐夜如何  
裊裊團扇渾無  
賴儘閉情捲付  
風荷繞夢舊時  
星斗撩人底處  
笙歌支床心事  
病維摩涼袂染  
秋多飄零莫問  
今何夕任西風  
替掃煙蘿畫取  
一痕清淺沈吟  
卻為斜河

虞美人

西亭曾是鶯花路綠徧銷魂樹飄鐙小閣雨聲寒不道  
有人閑倚畫闌干酒邊諳盡愁滋味醒眼難成醉殘  
鶯啼作斷腸聲我已自憐無計怎憐卿

解連環

亂紅無著正憑欄萬感餞春池閣甚斷夢還駐仙雲認  
偎鏡輕鸞淚妝低掠強醉酥香奈醒後宵寒偏覺又疏  
窗報曙攪起離腸一片淒角芳心幾番評泊憶鈿花  
颭影年時羅幙枉費盡綠賦紅吟待重檢愁痕暗塵飄  
卻浣雨柔枝料不負東風鈴索恁流鶯背人寄語怨春  
忒薄

木蘭花慢



為克齋題山游圖卷

黯疏林遠岫亂煙外掩孤顰記蕭寺尋題苔寒減髮松

老添鱗

用先德文恭公留題句意

輕篋幾穿翠徑惹禪香愁檢雨花

痕收拾龍城倦夢一鐘清出巖雲

生綃還駐詩魂征

雁影等閑分歎干霄劍氣銷沈短夜暗付殘樽歡游總

傷過客賸青山終古對斜曛憑問栖霞怨鶴天風細語

應聞

憶舊游

過水西莊遺蹟追懷查灣

認明漪夾鏡密翠通帷中卧修虹竹外朱樓近早歌殘  
世換鐙月怱怱錯教白頭詞侶來躡水雲蹤算隱几攤

經鉤簾賭曲猶是家風 低徊舊游處又酒舫花沈屨  
徑苔封一例風流歇更茆堂遲就輸與盧鴻夢邊故灣  
何許春淚野棠紅待招鶴歸時蓬山路隔應萬里

石湖仙

題石帚集

垂虹猶是好招手詞仙吟向煙水豪宕結羊裙儘纏綿  
吳絲怨淚江春留眼驀憶到雪天環佩拚醉問小蛾此  
恨知未 鴟夷漫懷舊隱感漂蓬江郎老矣卷裏啼鵲  
訴與同時青兕候館秋蕪戍樓寒吹夢醒何世花共悴  
多生枉負英氣

菩薩蠻



題清微道人仿馬湘蘭畫蘭卷子

鐙脣颭雨秋魂醒  
畫窗瘦了嬋娟影  
將淚寄清湘盈盈  
罷佛妝  
綢繆紅押尾莫誤青溪字  
一葉一花扶瑤田  
蜨到無

前調

和臣奩秋懷

霜心敲碎栖簷鐵  
高樓月墜啼鳥咽  
秋枕懶於雲閑苔  
綠到門  
吳蘭慵寄問懽盡都成恨  
碎竹響空欄天風  
夢佩環

臨江仙

冪翠陰陰池館靜  
簾波不散蘭薰藕  
颼微動報黃昏  
窺

匿眉月瘦迴枕臉霞溫  
疊鼓催歸歸也懶春心中酒  
微醺參差花影印羅裙畫屏雙倚處皺徧楚山雲

太常引

題詠霓女史畫菊

鈿叢細染綺羅香新樣點蜂黃  
憐取玉蔥涼莫暗怨瓊  
臺早霜  
獮屏曲罷金蕤汎淚幽影耐思量  
簾捲易斜  
陽怕更惹秋人斷腸

水龍吟

輓疆村詞丈

眼中煙柳斜陽斷腸又送詞人去  
承明先輩風華絕代  
飄零如許故國兵前浮名夢後料無迴顧更衰蘭慘涕



迷離恩怨空留恨牛衣語 海內清才有數歎滄波漚  
盟誰主抽簪縱早揮戈終負虞淵沈暮寄訊仙山凌雲  
一笑悲歡何據祇風流頓盡人間費淚寫江南賦

木蘭花慢

題陳圓圓道妝小像

早商山夢斷認鸞影是耶非倩粉鏡傳愁黃絕懺恨換  
卻宮衣淒迷翠蕪舊苑問山名鸚鵡幾人知畫裏雲鬟  
罷整乍疑蠟炬迎歸 仙扉燕老又花飛深坐淚雙垂

縱繁華閱盡滄桑家國總怨蛾眉芳期暗憐逝水甚香  
蓮還弄並頭枝

圓圓投蓮池死池中遂多發並蒂蓮

料得歸魂夜半橫塘

煙月依依

塞翁吟

贈雲邁

負卻鴛湖擢愁唱冷陌黃驄渺往事水雲空夢落桂香  
中青山有約留庵佳人海幾負秋風理倦緒弄吟筒待  
傳與吳鴻飄蓬身垂老雕欄換盡惆悵問花前舊踪  
夢華影荒波易洗枉凝盼北渚仙旗怨結蘭叢斜陽未  
晚照到霜林還勝春濃

君有賜臺觀  
紅葉之約

洞仙歌

憶梅和鐵夫韻

飄麝簾慵卷好春那更到新寒亭院正香塵似海綺愁  
無岸怱怱翠羽啼煙斷賸幾樹斜陽閑處戀虬籤轉早



喚起芳心銓影窺羅幔  
易變浮觴影事按笛年光冷  
夢醒初寄語閨苑東風肯信錦屏重暖天涯等是傷春  
眼空惹恨危欄孤倚徧情更遠渺鄉山一片飛紅意千  
萬乍淚泣驀酒醒驚霜琯又題瓊人去暗煙遮盡高樓  
晚

倦尋芳

雪殘寫感

鬪蛾戲罷眠鶴醒初人在瓊館晃夢東風偏又絮痕吹  
斷舞袖來遲臨笛怨吟欄偎久呼杯懶引遙情怕銀鋪  
碾碎畫輪催轉甚彈指飛鴻輕散林表量寒愁共深  
淺縞袂歸時何處夢雲堪戀逝水銷沈呵壁淚空花顛

倒登樓眼檢梅塵枉低徊謝娘庭院

掃花游

久不得臣盒書歲暮寄懷

倚樓怨別甚送暝關河去鴻都杳暮寒更峭怕吳霜短  
鬢冷船催老悶掩空尊歲事鐙前換了亂雲繞便重折  
瘦梅還為春惱幽徑渾懶掃記舊殘花陰暗迷啼鳥  
魀窗怨曉算孀娥解意旅愁分照淚入冰天浣卻秋蛇  
凍草夢醒早渺蓬山甚時重到

金菊對芙蓉

題霜根所藏王晉卿山水軸

石氣迎涼葉聲送晚尋詩孤倚巒岼指蒼苔一徑秋到



柴關含毫換了煙江稿費閑情商略梅鬢千金見享仇  
池縱換肯餉詩仙 太息寶繪堂空又紹興御賞禁籞  
松間怕丹青染淚來雁聲寒風流合付詞人手認小楓  
紅似當年拓義清畫古愁喚起一片殘山

鷓鴣天

和蒼虬旅感

迢遞雲陰擁海樓連村簫鼓亂羈愁栖栖絕塞隨陽雁  
渺渺神山落滌舟 雙闕夢五湖游春心賸有淚相酬  
千紅錯嫁東風去冷約梅花共淨修

臨江仙

燈影和內

散盡長筵珠翠年時春夢淒迷朦朧深坐聽荒雞箏心  
偎淚暗鏡背引愁低 金燼悄憐殘萼殷勤教展山眉  
夜香微熨思依依綠窗風不到多謝鎮犀帷

附琬君原作

遠寺鐘聲初歇疏簾一片淒迷荒村處處起鳴雞  
漸搖虛幌暗還傍曙窗低 深坐有人相對頻年  
照盡顰眉飛蛾繞袖總依依銅芝移玉局釵燕上

羅帷



許寶衡署

許寶衡署



修其角



金匱要略



潛思盦詩州我友挾云次子雁  
潭作也雁潭卒挾云哭之慟  
昉竹垞為以笛漁小橋附曝書  
集之例哀朽遠詩付梓然挾云  
之痛其子也實甚書竹垞蓋雁潭  
之九十年才二十有三公挾云奉

父安公諱免喪不及一載生耽典

籍向吟詠又文安公諱孫中克世其

學其也詩凡百餘篇沈思繇邈類

非苟作摺書其末尾序曰小子

作不足云詩憐生心光此在不忍

棄之鄉尋烟詩惜所玉心此願以一言



弁旌以揭志行庶足紓步沒  
世之烈也執書云之言抑若是

之惋也戚哉宣統初元執書云

甫兵溫處實生石潭於東

區官廨余見石潭系師已垂

暨去年時執書云方嗣執書國奉

文如公聚寔空觴詠為娛余三時厠  
座末孤潭出見客恂如成人體強  
癯而神骨清峻動心皆有矩範  
望而知為世家令子句切意誦唐  
宋人詩見言長此作極致為之久乃  
斐然成章以方治西學不日精理志



歲庚申長君學舉取書齋余為  
姑戲謂雁潭曰好讀書行為名免  
佳耦已而果為作合緣合於寶應朱  
氏丁卯冬雁潭親迎余已病風痺  
不克蒞末禮遂二年間生生子心為  
之喜不意子甫及晬而雁潭遽逝也

雁潭性溫厚篤內行視世之儼然少  
事恒遠之平居端然有言皆中理

蓋壯欽才而就範此理不應跌折而

充不祿豈非天歟士夫以來久矣刻

詩以余仕極讐言摅雲集成屬為之叙

今又叙雁潭詩而余固不工詩故徒以氣



宣沂契附庸風正三世詩像張公偏  
合然耆碩云亡清才早折病夫乃

獨告存性以此夢歷忘目尚述之百

感橫集上終無以生我執書之也性

為槩云云作叙病不能握以與傳他舍

之比似稍曠不疑連槩云云之意輒用自

考疥諸端而腕僅記先記此鬼  
勾視作惡其久之殘年頗廢其強本偶  
息而已擲筆三影辛未夏五  
日曹秉辛亥舊都時年六十有九





雁潭外孫秉詩禮之訓挺岐嶷之  
質當舉世張皇新說獨能篤志劬  
古矯然以自異余方卜其大成乃天  
畀以才胡夭其年而奪之速耶嘯  
麓取其遺詩附諸家集冀不泯其人  
余觀其詩克守家學具有途徑誦至  
詠雲之什若自知其不永歟然有離  
世之想如佛氏所謂超塵頓覺者雁潭

殆歸其位業矣夫一本之木枯苑不同  
雁潭雖夭折其孤久祺新芽秀茁異  
於常兒薪盡而火傳宜可稍塞哺麓  
之悲況遺集炳然終以壽岳是槁頌之  
儒所不可必得者夫亦何憾於彭殤耶  
壬申春日樂靜居士俞陞雲識於舊京





余諸子中獨誠兒篤古好文辭嘗為曹郎棄而學工商  
皆非其志也體弱復多憂感腸疾遽卒年二十有三耳  
余哭之慟蓋不惟失子之悲且痛夫累世舊學望是子  
以傳者彼蒼乃橫奪之也歿逾月檢遺詩得百餘首念  
其得年之促致力之勤迄無以自伸其志也爰甄汰而  
略存之以附於吾集之後夫以詩言之是猶玉之在璞  
也琢之雖未成其為玉者自在知其為玉而不能善琢  
以成之乃至摧折余之過也斯文天殛是區區者異日  
燒薪覆瓿終與吾集同之或亦天親之緣有未盡歟編  
竟悵然龍顧山人識時壬申二月

...

...

...

...

...

...

...

...

...

...

...



潛思盦詩草

侯官 郭可誠 雁潭

始春二日試筆是日大風

塵漲諸天黯風來萬木譁恍疑居朔漠有見但黃沙離  
亂餘今日流亡復幾家王春殊未改歲鼓隔村撾

次和效公新春遣興

梅蕊離離最有情催將春色滿春城暖迴林吹時飄袂  
凍解溪流可濯纓燈市何時從子醉硯田作計力吾耕  
倚樓惆悵無來雁自檢閒愁付小箏

詠李廣射石事

飛將威名久伏虜邊陲無事髀空拊短衣匹馬出郊坰

猿臂軒軒行射虎南山草黃秋寂寥據鞍但聽風調刁  
草間隱約於菟伏鉤爪張牙睥睨驕一發中的俛不鳴  
平明更視人皆驚始知技精出神力精誠所至乃貫石  
頗惜此才老不侯一矢未洞單于頭

雜興和石湖韻

不雨長暄雨即寒一晴新試苧衣單盆山勺水皆詩境  
也抵閭浮世界寬

剖來瓜果勝瓊漿風定池蓮自在香一卷唐詩消永晝  
心安穩處最清涼

靜中魚鳥各天機秀野亭邊看晚暉坐久吟眸添眩晃  
一團槐影上人衣



落盡黃梅雨似麻  
綠槐陰裏幾人家  
紛紛蠻觸爭何謂  
輸我東窗試鬪瓜

獨坐

獨坐南窗下風來几席清  
浮雲千萬態幽鳥兩三聲  
耐寂閒身健觀空妄念平  
微吟堪忘世底借濁醪傾

栩樓秋望

莫厭鷓鴣栖隘尋詩此縱眸  
羅雲低冪雨煙樹暗生秋  
別緒停琴覺名心看鏡休  
何心成獨樂鋒鏑徧神州

與三弟泛沽河同作

朔方自少佳山水猶喜荒涯著  
釣槎出沒亂波爭送日  
高低殘雪半沈沙中流帽側灘風急  
隔岸塵飛市語譁

倒影鷗天恰清絕壓河燈火萬人家

比日觀書頗恨腹笥之儉瀏覽所得萃錄於冊亦  
強記之助也賦此自勗

弱齡弄柔翰篤嗜在文辭劬心譬刻楮攻錯逾三思機  
滯眉屢攢神往頤久支取懷有爐冶出手非珠璣邇來  
稍泛覽一笑吾何癡六轡苦未調胡為縱騁馳握此徑  
寸苗終異干霄枝蛟龍妙變化所藉豈潢池儲學有本  
根欲速途乃歧請從識字始昌黎真吾師

歸塾園感賦用宋之問雨從箕山來韻

飛車迅羽翰冉冉重山度入門心先喜幽意生庭樹春  
芳秀且繁萬態爭一顧久居意豈淹暫涉有餘趣童游



儼在目追憶耿難喻離合事何常理以循環悟明發莫  
踟躕委心任留去

次和效公景山懷古

王城夢遠幾徬徨羨子閒踪弔古來詞客例多興廢感  
山亭長繫古今哀末途殉國餘孤恨初政鉏奸自壯才  
落落卅年一彈指依然蟬語響高槐

庭槐

拔地雙株古佳哉氣鬱蔥枝高先得日葉密暗搖風熱  
夢憑渠破孤心歷劫空自緣容庇大不礙穴青蟲

叔大效公枉過蟄園共話

寂寂園居久跼音得小留禽喧三徑暮木落一庭秋談

趣分茶隼棋聲出竹幽長安塵霧裏吟望莫登樓

京津車中誦杜集即用其韻得詩二首

車行漸見山洗眼非塵境澹日雲蔽虧眩晃落林影憑  
橋俯明漪野色照人冷逝軫去不淹憬然動孤省

白河終古流人事無定境十年幾經過鑒我悲歡影夢  
中韶顏非衣上征塵冷書劍竟何成撫躬勤自省

看雲

高低遠近澹還濃來去空隨海上風似惜荒枯山翠斷  
當窗為我補奇峰

安排林壑養疏頑舒卷無心一味閒也受斜陽成五色  
解留文采在人閒



與三弟登齡風臺晚眺

如棋樓錯置入畫水紆回徙倚叢臺迥迢遙暮景開攬襟聊自壯欲賦愧非才太息笙歌地從誰話劫灰

秋感

瘦石疏花一徑幽吾廬人外足淹留衣冠幾輩垂垂盡河水依然漚漚流世局轉旋誰可料高堂康樂復何求四郊消息猶多壘章武從來戰伐州

次效公秋懷韻卻寄

親舍畿南兩月留百城供我恣遨遊懶雲自信難為雨病木何堪又感秋瑟縮蟲呻涼月底飄蕭葉滿小池頭便鴻聊寄詩相慰莫為新詩動別愁

別夢還依北斗邊  
翩如玉樹立風前  
晚霞意豈爭孤鶩  
暮雨聲教噤衆蟬  
劫外沈冥天莫問  
古來憂患海難填  
新亭風景都非舊  
不為懷人亦憮然

亭側梨葉經霜而紅爛如濯錦詩以張之

秋氣收殘綠斑斑  
出晚叢此間宜夕照  
一樹奪江楓霜  
豔彌堪惜春華未許同  
病顏慙久對被酒  
漸微紅

偶成

累月城東又水東  
年來踪跡幾飄蓬  
生涯鳩拙從人笑  
心事蟬枯苦自攻  
隱几連朝驚我瘦  
堆簷一雪想年豐  
倚闌何限停雲感  
雁陣參差夕靄中

對雪



四圍天色入沈冥白戰猶酣未解停萬木支風苦蕭瑟  
微憐松竹尚青青

朔風吹送六花稠覆徧茫茫禹畫州漫道仙山無覓處  
望中是處是瓊樓

歲除

一廛猶異地明日復新春悵憊澆愁飲艱難避地人歲  
華今亦賤世味故多辛差喜無塵事閒吟寄此身

讀書

一閒百無營稍取陳編誦誦竟意如何方寸自相訟世  
方弱儒冠持此將安用泚泚豈計售在我千金重所席  
非素封幸免米鹽關不雕終何成自念屬愚忝此心類

奔駒歛之亦就鞚悠然歲月忘坐消齋幾甕

用柳柳州溪居韻寄懷效公

君才本侔儻高擬謫仙謫過從昕夕俱交深忘主客行  
吟躡芳草坐語拂巖石白雲不可淹天宇悠然碧

黌舍

黌舍郊南壯森森萬木間樓陰臨碧野人語落清灣類  
壁風非古絃歌意自閒栖枝慙倦羽竟日語綿蠻

午晴散步始聞蟬聲

流潤青郊雨乍晴叢生花草不知名垂楊陰裏薰風轉  
聽到吟蟬第一聲

河干遣興杜工部韻



洗眼風埃外秋情一水賒日沈雲散錦魚過浪生花估  
舶收帆晚漁村抱岸斜鷗鄉端可羨是處足浮家  
霄半收殘雨河干正晚晴浩歌天宇碧小立水風清有  
託惟騷雅何心及利名終思航一葦湖海寄浮生

雨夜和陸天隨韻

荷喧竹碎蕉聲大電掣金蛇照孤卧天門一噫江河翻  
阿香怒騁封姨佐冥冥銀竹失奇觀倒捲劇愁屋茆破  
奔騰萬籟一時收起剔涼缸擁書坐

慰肅人投閒

迢迢尺素喜先投往事驚心逝軫道郊路霜多行迹斷  
市樓人去酒痕留豈期暫別俄移歲多恐孤吟易感秋

彭澤休官莫惆悵政宜青眼對沙鷗

述感

書劍蹉跎弱冠身思量百事總輸人鏡中愁見朱顏改  
夢後心依白業新掩卷忽思游汗漫憂時空負膽輪囷  
雕蟲况味真雞肋拙筆拈來苦不神

沽河

瑟瑟霜風捲怒波出門數武即沽河石壕村裏家家淚  
應比東流水更多

游瑩園

屢居狎塵喧散策忻近水緣坡入幽叢秋色清如此臺  
高俯千林其下臨芳沚百畝足風煙奔湊雙瞳底從來



高明地豈免千夫指帶甲昔憑陵囂然競棲趾兵來圍  
久荒兵去園亦毀尋春舊亭榭強半荆榛委風光竟屬  
誰多事營居止劫運亘九州茫茫失神理聊寄蕭寥觀  
過與煙禽比

和效公游北海原韻

霽翠西山遠繞城雨餘樓閣不勝清金飈送晚千蟬噤  
碧漲翻空一鷺明客日偶閒供跌宕塵心暫豁對崢泓  
荒涯何處尋詩境賸欲追攀慰別情

栩園偶題

風光恰稱隱人家一角山屏疊翠斜畫幌書籤窗四照  
茅亭竹徑路三义未妨孤卧從吾懶已覺閒居得此奢

向晚巡行聊一快種來新柳欲勝鴉

雨後即景與蕙纓韻眉雨妹聯句

一夜蕭蕭雨閒園落葉多

雁

蟬吟沈遠樹松吹裊輕蘿

韻草長從僮懶詩成喜客過

雁

小池魚最樂連夕漲清

波蕙

答效公寄什兼懷叔大

天風吹雁墮海濱清詞照眼無纖塵怪君孟晉胡乃爾  
欲和歛手心逡巡君才磊落終乖俗欲掉扁舟武陵曲

君詩結句云云

世無仙源空復尋一室因依即奇福我願嘯侶

人兩三坦懷相對多名談興來弄筆出天趣師友陶謝  
參瞿聃二妙不來成獨歎雨風如晦鳴雞斷人生萬事



稱意難我聊爾爾君其漫

借句

### 雪後寫望

積白出層樓如山露厥髻衆木失瓊瑤松竹兀蒼翠流  
連愛冬旭萬象媚初霽倚晴人意舒畏凍雀聲細殘霽  
駐餘寒浩態若潛蛻銀鋪雜滲金映帶彌輝麗園居半  
畝間俯仰恣憑睨風物清以曠頗與吾懷契燹餘紛哀  
鴻裘履兩無計忻茲及時雪一為驅灾癘

### 元日用隨園韻

盆梅的礫媚元辰爆竹聲殘歲又新力矯夏時空數數  
相因民俗尚陳陳條風試暎迎初旭快雪占豐及始春  
一室粗溫吾願足但將康吉祝衰親

上元書感

無復飛蛾舞雪輕  
疏燈冷落月空明  
圍觀憶及承平夜  
墜翠遺珠滿禁城

意園散步

東風無力速春回  
一雨芳原倦眼開  
花夢猶慵鶯喚破  
草光能媚蝶飛來  
罕逢人迹宜孤賞  
似引詩情費巧裁  
喬木亭亭已如此  
幾株寥落憶初栽

步叔大用太白千里曲韻見懷

春暖不揚沙  
春風吹萬家  
遙鴻遞新句  
燦燦生奇花  
即此敵相見  
願喜勿復嗟  
兩心苟不渝  
何恨天一涯

豐臺



高槐弄影雜陰晴側帽風來暑氣清知道豐臺前路近  
耳邊一派賣花聲

蟄園偶成

故園偶涉倍情親屈指離家又一春黃蝶成行穿竹出  
翩翩如訝遠歸人

莫嗟來未及春深放眼池臺愛綠陰正是東園好時節  
槐花如雨一蟬吟

南海紀游

洗眼湖光闊車塵苦頓忘臺空宮樹暗路斷御碑荒萬  
感歸沈寂孤吟入莽蒼揚塵今幾見此海亦生桑

寄筴索效公書畫勝以長句

此事今人久不屑君偶為之獨精絕畫奇書雋如其人  
我雖望洋亦心折邱壑在胸下筆輕林姿石骨俱崢嶸  
書參歐柳得神髓筆妙遂使二美并磅礴看君游墨沼  
或如鷗翔或龍矯悠悠目論彼何知造化與參技無小  
古來能事不伐功我乃兼嗜熊魚同尺筴遠致意殊侈  
入手披拂皆仁風此心金石存縑素白首如新筴如故  
相看不厭敬亭山持障庾塵勿輕污

夏日遣興

一室如巢容偃仰百年過隙付優游風光寂寂晴還雨  
林木陰陰夏亦秋午夢醒時書繞榻夜吟清處月當樓  
疏慵自樂從人笑畢竟陶情勝賦愁



輓嚴範孫先生即次其自輓韻

千秋道德文章重豈限先生甲子旬嚴助蘭臺推老輩  
文翁石室屬傳人艱難新學開藍華感慨橫流託隱淪  
腸斷春風舊桃李論交三世最情親

寄懷叔太濟南

秦岱作屏障河流相枕藉厯下本名城安危繫天下叔  
大亦豪士於焉有廬舍豈意鄒魯邦戎車竟再駕剽掠  
甚蜚蝗農野無完稼念君在圍城傳聞猶夢怕而君附  
書至脩辭整以暇鍛詩火漸青餘味如啖蔗杜陵值亂  
離陳芳乃定霸君遇雖差殊撫時同憤咤窮工古有云  
進境吾甯訝北征會有時說詩供膾炙

再寄叔大

身入蠹魚叢俗態何由曉世方賤腐儒我甯識字少  
聚日豈云樂論文昏復曉一別抱琴孤始歎知音少  
策策竹窗秋隱隱槐庭曉亦知愁損人閒愁安得少  
唧唧復唧唧蟋蟀鳴達曉懷人此夕情未抵蟲聲少

游北海同大兄作

竊然湖水浸霞紅蓼渚蘋灣曲折通多少垂楊青不斷  
畫船人在澹煙中

秋雨次韻

正傍涼軒欣暑退無聊秋雨復成霖粘萍波長三分碧  
鑄菊霜催萬點金笑我忘機甘抱甕知君多感怕聞砧



危時懷抱崢嶸在莫怨西風短鬢侵

次杜荀鶴寄友韵寄效公

難忘東園集燈筵笑語親俯池波鑑影穿徑鳥驚人微  
尚同乖俗閒情不累身篋衣愁更浣惜取舊京塵

園望寫懷

荒涯足留人十年此卜築種樹看成陰飛光去何速詞  
人搖落悲秋氣若有觸吾意獨宜秋肅然淨煩溽林木  
漸以疏一縱馮高目蕩蕩霜宇寬心與白雲逐入世如  
浮塵胡為長局促竹窗晚蕭寥還檢我書讀

寄體乾遼左

天外遼雲隔夕陽索居無事不迴腸難忘什剎橋邊路

人語蟬聲柳數行

瑟瑟霜風木葉寒看君初整遠游冠  
枯吟我亦藜床破卻愧遼東管幼安

讀李我素南游詩次韻寄之

君才老鵲健摩空客路登高著句工  
九派江流收卷裏六朝山色落杯中  
秋來天地風煙闊境跨荆吳氣象雄  
聽到陽春慙屬和繞梁餘韻幾曾終

憶昔一首即步杜陵憶昔韻簡效公

憶昔王城行負笈逢君如入芝蘭室  
深談往往見襟期獨黜春華表秋實  
別來海曲久栖栖坐守柴門殊懶出  
飲醇餘味耿難忘日對空尊如有失  
新交幾輩皆漫與



拙性於君譬膠漆我生但癖郝隆書君志欲學蕭何律  
吁嗟學成亦焉用九野茫茫多戰血危厦但付蓬蒿撐  
故宮今為狐兔穴故知剝復終有時誰廣柳州作天說  
腐儒拘備世所棄寒骨豈合歆華秩一枝有託且從容  
目送長空飛隼疾

冬日書感

自將書卷對孤燈兀兀窮年感不勝危劫未妨心澹定  
小詩如見骨峻嶒病知止藥為中策禪悟非臺是上乘  
林壑逍遙吾未卜安排權作在家僧

雪意

翻空鍊水意殊奇黯黯樓臺待雪時吹幕風嚴如有報

擁林雲凍欲成癡，偃寒睡鶴頻頻警。誤暝歸鴉故故遲，  
便擬呼觴還自懶。微吟閒熨小梅枝。

初春喜雨

東皇命駕初屏翳，導先路偉哉造化功。百昌播甘澍，凌  
晨襲餘爽。流眄周庭樹，生意盎然回柔條。疏以布稜稜，  
池上石皴皴。各呈露塵壒，一盪除萬象。皆非故，雖無絢  
爛觀雅得悠閒趣。即此契天倪，攬襟絕浮慕。

懷肅人用黃仲則夜坐懷曹以南韻

向陽庭樹初放綠，枝頭瓦雀鳴相續。浮雲笑我盡日間，  
歸羽念君何處宿。春來悵望隔苔岑，河岱脩阻無來音。  
風光駘蕩自千里，卷然不轉霜蓬心。



次石湖陰寒終日兀坐韻

障風簾幙寒猶殢近水園林晚更清  
病後近懷耽懶散春初芳候雜陰晴  
坐當窗竹頻移影吟先林鴉若和聲  
覽鏡忽驚同島瘦自緣琢句太勞生

春日絕句和石湖韻

碧漪影入鏡天澄向暖芳疇漸可耕  
北地荒寒風物儉畧回春色是清明  
暝色烟帆入望遙岸頭人語自喧宵  
一灣盪盡千燈影絕妙風光屬小橋

得都下舊雨書卻寄

憚寒未卸薄棉衣嫩綠捎簷已作圍  
誤卻花時嗟病久

懶親塵務笑書稀陳編過眼頻頻忘往事迴腸種種非  
獨寫小詩更愁絕年來慣與故人違

春盡書感

掃盡千紅迹層陰掩畫樓不知時節換但覺戶庭幽病  
起春猶寂春歸病卻留自憐昧生理無計遣閒愁

涉園見白牡丹一枝特盛詩以賞之

綠陰誰道過花時愛此欄前白玉枝魏紫姚黃齊俯首  
要從平淡見丰姿

京津道中

去去車程迥風蟬響正繁高低山外驛出沒樹邊村多  
稼欣生理佳兵憊禍根奔輪喧不厭聊與役吟魂



偶成

幾番雨過熟梅時  
病退身閒事事宜  
午枕當風清入夢  
夜廊坐月澹邀詩  
定巢梁燕還如客  
聒耳池蛙總屬私  
悟澈隨緣安樂法  
未妨人喚虎頭癡

示效公

同病吾與爾所病  
在伏案君尤勤  
過我命侶惟柔翰  
人生賦百體胡為徇疲腕  
久坐神乃滯疾來孰與捍  
蘊溼入蹊跬步履諒益憚  
箴君亦自箴動靜宜閒換  
止水水易淤流水光爛爛

培初枉談別後寄懷

別來何限意意外得相逢  
邁往翰君健深談起我慵  
互

傳新信息未改舊音容揮手匆匆去雲山又幾重

歸鳥

前路霜風急相呼集復翔眼中非故壘天外幾斜陽孤  
往將安託羣飛各自忙攬雲心亦壯無奈暮程長

秋宵感懷

迤邐深廊見月明花繁露泣各盈盈一腔幽緒憑誰訴  
不及涼蛩自在鳴

又見霜高木葉疏依然兀兀守吾廬誤人應是青燈最  
金紫何嘗用讀書

不寐

沈沈夜色息羣譁看到天中月影斜悶理殘書甯有癖



閒雕新句苦多瑕  
荒雞喚起心猶舞  
栩栩蝶招來夢是家  
多少世人酣醉裏  
偏教獨醒閱年華

雜感示肅人

東風感水水生鱗  
山翠迎人作淺顰  
料是吟筇閒未得  
勞生幾見故園春

蕭蕭銅陌酒人稀  
七百年來舊帝畿  
再聚感深遼海鶴  
更愁城郭也全非

近日禁城拆盡

春暮感懷寄叔大

別後詩愁強自支  
傳書每怪雁來遲  
沈腰潘鬢非前日  
綠暗紅稀又一時  
話舊久疏餘索夢  
傷春欲賦費搜辭  
世情翻覆休相問  
尚擬從君漫鬪碁

曉起花下作

看花人競出郊墟獨愛芳園畫不如一片紅雲迷遠近  
仙源深處即吾廬

剛看紅白各成叢幾日狂吹忽已空一例敗人春意興  
江南多雨北多風

午睡初覺口占成詠

午枕佳眠足宜人勝按摩豈惟舒積倦兼為散微疴日  
轉花陰靜風平鳥語和起看春色滿興至一吟哦

夜夢與效公叔大聚談

客冬聚王城朔吹正揚堞連裾短巷行顧影寒月墮懽  
塵酒在襟流光箭抽筭咫尺若隔天行止詎由我趾離



信解人招我置君左宛然黌舍居促膝雜喧歌郎子顏  
如初叔子勞且瘁握手問何如得勿憂兵火連媽語未  
終款洽意亦頗為想即為因夙約何時果梁月眷餘輝  
攬衣成獨坐

夏日即事和叔大

吟蟬聲裏日初長送盡驕陽又夕陽搜句苦無新境界  
懷人憶到舊年光世情翻覆爭棋劫天意迷茫入醉鄉  
安得從君河朔飲晚風徐送碧簫香

述感用效公重五韻寄之

蘧蘧二十三年夢憶到心頭每自驚世亂乘槎空有志  
身孱學劍亦何成橫流同盡嗟今日朽木難雕買此生

百感中來君識否夢回長夜更淒清

家慈自舊京携蓮蓬歸分食甚甘偶賦

助我吟哦逸興長分甘樂事傍高堂  
征程色味何曾減聞到液池秋水香

長歌答閻子

龍門之桐百尺高上有威鳳集復翺軒軒文采出儔輩  
眼中閻子真人豪一書生耳憂天下縱論利病窮秋毫  
風騷跌宕特餘事意氣欲躡東海鰲我初論交共黌舍  
飲以至味如醇醪三年不見意悽惻昔為蛩駘今燕勞  
讀書萬卷亦焉用俯仰家國徒憂忉麀頭鼠目各華膴  
我輩濩落宜蓬蒿士生衰時抱殘缺危如絕嶺懸茅綯



狂瀾手挽雖有志吁嗟斯世方滔滔雲萍離合豈足計  
努力明德無疑懣摧輪世路豈終塞飛騰會有伯樂遭  
古來吾道間伸屈躬耕猶羨延陵臯

灌畦

暇日襲餘勤灌畦躬抱甕種豆落為箕蒼蔚滋莢葑榮  
悴非物能造化神其用拙計且力耘耰苗吾所恐

秋陰

閒庭黯黯桂煙涼天澹雲高雁數行風雨不來應有待  
要留籬菊傲重陽

書感

直將河北作龜茲後主當年妙解頤出塞儘誇好身手

入宮空舞細腰肢時來飛渡三千水氣盡橫磨十萬師  
如此荊州甘坐棄可憐豚犬景升兒

冬日書事二首

兵氛看不極七十二沽長烽起連天赤沙飛浴日黃有  
懷吟碩鼠無計斂天狼誰料笙歌地於今作戰場  
拱手三邊失因循策豈長蟲沙看枕藉杖繯走倉黃弱  
宋真魚肉強秦劇虎狼熱河行幸地存否舊圍場

效公叔大書詢近狀卻寄

聞道游兵夜劫營喧喧礮火動危城故交累札千金重  
久病微軀萬事輕買鬪深憐民命賤論才誰奠國基傾  
酸寒縱乏屠鯨手也為同仇憤不平



以挾書近照附寄效公綴以絕句

一笑清癯失故吾  
髭齡影事亦模糊  
此身不信儒冠誤  
把卷依然古與徒

寒月

如期圓缺幾曾慵  
桂魄娟娟亦耐冬  
窺檻人癯如立鶴  
橫窗樹禿儼蟠龍  
簾開影入冰綃麗  
琴罷光生翠幙重  
恰似胸中塵障淨  
霜空不著片雲封

遠隱繁星近掩燈  
騰空孤影自稜稜  
弓張碧落僵難滿  
眉畫銀鉤凍欲凝  
萬戶素波樓望客  
一肩涼玉夜歸僧  
人間熱惱全消盡  
試倚瑤臺最上層

寒柝

荒雞未動夜冥冥數盡殘更待曙星響過長街千籟寂  
夢回蕭館一燈熒霜催急節頻縈枕風帶淵音故繞庭  
羣盜縱橫何日息有人占恨共駝鈴

朱門歌舞未渠央偏是愁人易斷腸萬帳防邊風瑟縮  
九衢禁夜月淒涼心輸警枕能知候思引孤琴正履霜  
最是五更清澈骨恍聞別浦響漁榔

早起即事

金爐宿火曉猶溫雲際微濛上早暾傍市人家多晏起  
一林殘雪未開門

對雪敬次家君韻

危時豈有瑞堪書聊喜分光到野居樓瓦裝瓊添戍削



階篁欹玉兀森疏壯觀轉恐寒消盡靜對眞教意泊如  
肯羨豪門羔酒樂白裘心事付長歎

次和效公書憤

邊風慘入早寒時一旅孤軍獨攘夷援絕忍令成坐困  
寇深何意復乘危旌旗北伐仍無日砥柱中流欲倚誰  
急劫炎崑甯倖免江南半壁料難持

聞壽芬師客鄭州戎幕以疾歸賦此奉訊

父執公長者師事吾所敬東園講席從請業曾未竟海  
孺復瞻依松姿晚逾勁崎嶇坐一貧垂老就徵聘懸知  
籌筆勞聞疾心恹恹人來聞小痊有子捧輿迎都城儼  
在眼息駕倘相慶吾師秉冲和鳶魚契翔泳正氣有常


盈雖困亦何病德人天永篤所樂在知命病起及春韶  
願言侍風詠

歲晏

壑蛇行沒尾歲晏耿餘悲光景飛騰疾乾坤戰伐危心  
疏依故硯劫急念枯棋百輩橫流盡河清待幾時

潛思盦詩草終





...

...

...

...

...

...

...

...

...

...

...

...





